



王陽明集六

外集
詩

法

廿年

特 別
013
3196
7



門 13
號 3196
卷 7

陽明先生文錄卷之三

外集

廬陵詩三首

正德庚午年三月遷廬陵尹作

遊瑞華二首

簿領終年未出郊此行聊解俗人嘲憂時有志懷先
達作縣無能愧舊交松古尚存經雪幹竹高還長拂
雲稍溪山處處堪行樂正是浮名未易拋

其二

萬死投荒不擬回生還且復荷栽培逢時已負三年
學治劇兼非百里才身可益民寧論屈志存經國未
全灰正愁不是中流砥千尺狂瀾豈易摧

昭和十七年
四月二十日
購求

古道

古道當長坂肩輿入暮天蒼茫聞驛鼓冷落見炊烟
凍燭寒無焰泥爐濕未燃正思江檻外閒卻釣魚船
立春日道中短述

臘意中宵盡春容傍曉生野塘冰轉綠江寺雪消晴
農事沾泥犢羈懷聽谷鶯故山梅正發誰寄欲歸情

公館午飯偶書

行臺依獨寺僧屋自成鄰殿古凝殘雪墻低入早春
巷泥晴淖馬簷日暖堪人雲散小岩碧松梢桂月新
午憇香社寺

脩程動百里往往餉僧居佛鼓迎官急禪牀為客虛
桃花成井落雲水接郊墟不覺泥塗澁看山興有餘

京師詩二十四首

正德庚午年十月陞南京刑部主事辛未年入覲調北京

吏部主事作

夜宿功德寺次宗賢韻二絕

山行初試夾衣輕脚軟黃塵石路生一夜洞雲眠未
足湖風吹月渡溪清

水邊楊柳覆茅楹飲馬春流更一登坐久遂忘歸路
夕溪雲正瀉暮山青

別方叔賢四首

西樵山色遠依依東指江門石路微料得楚雲臺上
客久懸秋月待君歸

自是孤雲天際浮篋中枯蠹豈相謀請君靜後看羲
畫曾有陳編一字否

休論寂寂與惺惺不妄由來即性情笑却慙慙諸老
子翻從知見覓虛靈

道本無爲只在人自行自住豈須鄰坐中便是天台
路不用漁郎更問津

白灣六章

宗巖文先生居白浦之灣四方學者稱曰白

浦先生而不敢以姓字某素高先生又辱爲
之僚因爲書白灣二字并詩以詠之

浦之灣其白漫漫彼美君子在水之船益

灣之浦其白瀾瀾彼美君子在水之沃

雲之溶溶于灣之湄君子于處民以爲期

雲之油油于灣之委君子于興施及四海

白灣之渚子遊以處彼美君子兮可以容與

白灣之洋于濯以湘彼美君子兮可以徜徉

寄隱巖

每逢山水地便有卜居心終歲風塵裏何年滄海濤

風雅
味

洞寒泉滴細花。暝石房深青壁。須留姓他時好共尋。

香山次韻

尋山到山寺。得意却忘山巖樹。坐來靜壁蘿春自閑。樓臺星斗上鐘磬。翠微間。頓息塵寰念。清溪踏月還。

夜宿香山林宗師房次韻二首

幽壑來尋物外情。石門遙指白雲生。林間伐木時聞響。谷口逢僧不記名。天壁倒涵湖月曉。烟梯高接緯堦平。松堂靜夜渾無寐。到枕風泉處處聲。

久落泥途惹世情。紫崖丹壑是平生。養真無力常懷靜。竊祿未歸羞問名。樹隱洞泉穿石細。雲過溪路入

花平道人只住層蘿上。明月峯頭有磬聲。

別湛甘泉二首

行子朝欲發。驅車不得留。驅車下長坂。顧見城東樓。遠別情已慘。况此艱難秋。分手訣河梁。涕下不可收。車行望漸杳。飛埃越層丘。遲回岐路側。孰知我心憂。

其二

我心憂以傷。君去阻且長。一別豈得已。母老思所將。奉命危難際。流俗反猜量。黃鵠萬里逝。豈伊為稻梁。棟火及毛羽。燕雀猶棲堂。跳梁多不測。君行戒前途。達命諒何滯。將毋能忘虞。安居尤寤獲。關路非岐嶇。

令德崇易簡可以知險阻結茆湖水陰幽期終不忘
伊爾得相就我心亦何傷世艱變倏忽人命非可常
斯文天未墜別短會日長南寺春月夜風泉間竹房
逢僧或停檝先掃白雲床

贈別黃宗賢

古人戒從惡今人戒從善從惡乃同污從善翻滋怨
紛紛嫉媚興指謫相非訕自非篤信士依違多背面
寧知竟漂流淪胥亦污賤卓哉汪陂子奮身勇厥踐
拂衣還舊山霧隱期豹變嗟嗟吾黨賢白黑匪難辯

歸越詩五首

正德壬申年陞南京太僕寺少卿便道歸越作

四明觀白水二首

邑南富巖壑白水尤奇觀興來每思往十年就茲觀
停騶指絕壁涉澗緣危端百源旱方歇雲際猶飛湍
霏霏灑林薄漠漠凝風寒前聞若未愜仰視終莫攀
石陰暑氣薄流觸迴澗瀾茲遊詎盤樂養靜意所關
逝者諒如斯哀此歲月殘擇幽雖得所避時時猶難
劉樊古方外感慨有餘嘆

千丈飛流舞白鸞碧潭倒影鏡中看藤蘿半壁雲烟
濕殿角長年風雨寒野性從來山水癖直躬更覺世
途難卜居斷擬如周叔高計無勞比謝安

杖錫道中用張憲使韻

山鳥懽呼欲問名，山花含笑似相迎。
風迴碧樹秋聲早，雨過丹巖夕照明。
雪嶺插天開玉帳，雲溪環碧抱金城。
懸燈夜宿茅堂靜，洞鶴林僧相對清。

又用曰仁韻

每逢佳處問山名，風景依稀過眼生。
歸霧忽連千嶂暝，夕陽偏放一溪晴。
晚投巖寺依雲宿，靜愛楓林送雨聲。
夜久披衣還起坐，不禁風月照人清。

書杖錫寺

杖錫青真端澗壁，環天險巖下陡壑。
涉水攀絕巖

磴深聽喧瀑，路絕駭危棧。捫蘿登峻極，披翳見平行。
僧逋寄孤衲，守廢遺荒殿。傷茲旁僻墟，曾未誅求免。
探幽冀累息，憤時翻意慘。拯援才已踈，栖遲心益眷。
哀猿嘯春嶂，懸燈宿西崦。誅茆竟何時，白雲愧舒卷。

滁州詩三十六首

正德癸酉年到太僕寺作

梧桐江用韻

鳳鳥久不至，梧桐生高岡。我來竟日坐，清陰灑衣裳。
援琴俯流水，調短意苦長。遺音滿空谷，隨風逝悠揚。
人生貴自得，外慕非所臧。顏子豈忘世，仲尼固遑遑。
已矣復何事，吾道歸滄浪。

林間睡起

林間盡日掃花眠。祇是官閒媿俸錢。門徑不妨春草合。齋居長對晚山妍。每疑方朔非真隱。始信揚雄誤太玄。混世非能隨地得。野情終是愛丘園。

贈熊彰歸

門徑荒涼蔓草生。相求深媿遠來情。千年絕學蒙塵土。何處澄江無月明。坐看遠山凝暮色。忽驚庭葉起秋聲。歸途望嶽多幽興。爲問山田待耦耕。

別易仲

○辰州劉易仲從予滁陽一日問道可言乎予

曰啞子喫苦瓜。與你說不得。爾要知我苦。還須你自喫。易仲省然有悟。久之辭歸。別以詩送。迢遞滁山春子行。亦何遠。纍然良苦心。恟恍不遑飯。至道不外得一悟。失群聞秋風。洞庭波遊子。歸已晚。結蘭意方勤。寸草心先斷。末學久低離。頽波竟誰挽。歸哉念流光。一逝不復返。

送守中至龍盤山中

未盡師生六日情。天教風雪阻西行。茅堂豈有春風坐。江郭虛留一月程。客邸琴書燈火靜。故園風竹夢魂清。何年穩閉陽明洞。楫拙山爐煮石羹。

龍蟠山中用韻

無奈青山處處情，村沽日日辦山行。真慚廩食虛官守，只把山遊作課程。谷口亂雲隨騎遠，林間飛雪點衣輕。長思澹泊還真性，世味年來久絮羹。

瑯琊山中三首

草堂寄放瑯琊間，溪鹿巖僧且共閑。冰雪能回草木死，春風不化石頭頑。六經散地莫收拾，叢棘被道誰刊刪。已矣驅馳二三子，鳳圖不出吾將還。狂歌莫笑酒盃增，異境人間得未曾。絕壁倒翻銀海浪，遠山真作玉龍騰。浮雲野思春前動，虛室清香靜

後疑懶拙惟餘林，小壑計伐檀長自媿無能。

風景山中雪後幽，看山雪後亦誰曾。隔溪巖犬迎人吠，飲澗飛猿踔樹騰。歸騎林間燈火動，鳴鐘谷口暮光凝。塵踪正自縹籠在一宿，雲房尚未能。

答朱汝德用韻

東去蓬瀛合有津，若爲風雨動經旬。同來海岸登舟者，俱是塵寰欲渡人。弱水洪濤非世險，長年三老定誰真。青鸞眇眇無消息，悵望烟花又暮春。

送惟乾二首

獨見長年思避地，相從千里欲移家。慚予豈有萬間

外集
元陽明文集卷三
庇借爾剛餘一席沙古洞幽期攀桂樹春溪歸路問
桃花故人勞念還相慰回鴈新秋寄綵霞
簷笈連年愧遠求本來無物若爲酬春城驛路聊相
送夜雪空山且復留江浦雲開廬嶽曙洞庭湖濶九
疑浮懸知再鼓瀟湘柁應是芙蓉湘水秋

別希顏二首

中歲幽期亦幾人是誰長負故山春道情暗與物情
化世味爭如酒味醇耶水雲門空舊隱青鞋布襪定
何晨童心如故容顏改慚愧年年草木新
後會難期別未輕莫辭行李滯江城且留南國春山

品
想
及
人

興共聽西堂夜雨聲歸路終知雲外去晴湖想見鏡
中行爲尋洞裏幽棲處還有峰頭雙鶴鳴

山中示諸生五首

路絕春山久廢尋野人扶病強登臨同遊仙侶須乘
興共探花源莫厭深鳴鳥遊絲俱自得閒雲流水亦
何心從前却恨牽文句展轉支離嘆陸沉

其二

滁流亦沂水童冠得幾人莫負詠歸興溪山正暮春

其三

桃源在何許西峰最深處不用問漁人沿溪踏花去

古
溪

自得
真境

其四

池上偶然到紅花間白花小亭閒可坐不必問誰家

其五

溪邊坐流水水流心共閒不知山月上松影落衣斑

龍潭夜坐

何處花香入夜清石林茅屋隔溪聲幽人月出每孤
往棲鳥山空時一鳴草露不辭芒履濕松風偏與葛
衣輕臨流欲寫猗蘭意江北江南無限情

送德觀歸省二首

雪裏閉門十日坐開門一笑忽青天茅簷正好負暄

日客子胡爲思故園椿樹慣經霜雪老梅花偏向歲
寒妍瑯琊春色如相憶好放山陰月下船
瑯琊雪是故園雪故園春亦瑯琊春天機動處即生
意世事到頭還俗塵立雪浴沂傳故事吟風弄月是
何人到家好謝二三子莫向長沮錯問津

送蔡希顏三首

正德癸酉冬希淵赴南宮試訪予滁陽遂留
閱歲旣而東歸問其故辭以疾希淵與予論
學瑯琊之間於斯道旣釋然矣別之以詩
風雪蔽曠野百鳥凍不翻孤鴻亦何事噉噉遡寒雲

豈伊稻梁計獨往求其群之子眇萬鍾就我滁水濱
野寺同遊詣春山共攀援鳥鳴幽谷曙伐木西澗曛
清夜湛玄思晴牕玩奇文寂景賞新悟微言欣有聞
寥寥絕代下此意冀可論

群鳥喧北林黃鵠獨南逝北林豈無枝羅弋苦難避
之子丹霞姿辭我雲門去山空響流泉路僻迷深樹
長谷何盤紆紫芝春可茹求志斲棲巖避喧寧遯世
繫予辱風塵送子媿雲霧匡時已無術希聖徒有慕
倘入陽明峰為尋舊樓處
何事憧憧南北行望雲依闕兩關情風塵暫息滁陽

駕鷗鷺還尋鑑水明悟後六經無一字靜餘孤月湛
虛明從知歸路多相憶伐木山山春鳥鳴

贈守中北行二首

江北梅花雪易殘山牕一樹自家看臨行撥贈聊數
顆珍重清香是歲寒
來何匆促去何遲來去何心莫漫疑不為高堂雙雪
鬢歲寒寧受北風欺

鄭伯興謝病還鹿門雪夜過別賦贈三首

之子將去遠雪夜來相尋秉燭耿無寐憐此歲寒心
歲寒豈徒爾何以贈遠行聖路塞已久千載無復尋

豈無群儒迹，蹊徑榛莽深。清流湏尋源，積土成高岑。
攬衣望遠道，請君從此征。

濬流須有源，植木須有根。根源未濬，植枝派寧先蕃。
謂勝通夕話，義利分毫間。至理匪外得，譬猶鏡本明。
外塵蕩瑕垢，鏡體自寂然。孔訓示克己，孟子垂反身。
明明賢聖則，請君勿與譖。

鹿門在何許，君今鹿門去。千載龐德公，猶存棲隱處。
潔身匪亂倫，其次乃避地。世人失其心，顧瞻多外慕。
安宅舍弗居，狂馳驚奔鶩。高言詆獨善，文非遂巧智。
瑣瑣功利儒，寧復知此意。

門人王嘉秀實夫蕭琦子玉告歸書此見別意

兼寄聲辰陽諸賢

王生兼養生，蕭生頗慕禪。迢迢數千里，拜我滁山前。
吾道既匪佛，吾學亦匪仙。坦然由簡易，日用匪深玄。
始聞半疑信，既乃心豁然。譬彼土中鏡，闇闇光內全。
外但去昏翳，精明燭媿妍。世學如剪綵，粧綴事蔓延。
宛宛具枝葉，生理終無緣。所以君子學，布種培根原。
萌芽漸舒發，暢茂皆由天。秋風動歸思，共鼓湘江船。
湘中富英彥，往往多及門。臨岐綴斯語，因之寄拳拳。

滁陽別諸友

滁陽諸友從遊送予至烏衣不能別及暮王
性甫汝德諸友送至江浦必留居俟予渡江
因書此促之歸并寄諸賢庶幾共進此學以
慰離索耳

滁之水入江流江潮日復來滁州相思若潮水來往
何時休空相思亦何益欲慰相思情不如崇令德掘
地見泉水隨處無弗得何必驅馳爲千里遠相即君
不見堯羹與舜墻又不見孔與跖對面不相識逆旅
主人多慇懃出門轉盼成路人

寄浮峰詩社

晚涼庭院坐新秋微月初生亦滿樓
千里故人誰命駕百年多病有孤舟
風霜草木驚時態砧杵關河動
遠愁飲水曲肱吾自樂茆堂今在越溪頭

棲雲樓坐雪二首

纔看庭樹玉森森忽漫階除已許深
但得諸生通夕坐不妨老子半酣吟
瓊花入座能欺酒冰溜垂簷欲
墮針却憶征南諸將士未禁寒夜鐵衣沉

此日棲雲樓上雪不知天意爲誰深
忽然夜半一言覺又動人間萬古吟
玉樹有花難結果天機無線可
通針曉來不覺城頭鼓老懶羲皇睡正沉

與商貢士二首

見說浮山麓深林遶石溪何時拂衣去三十六巖棲

其二

見說浮山勝心與浮山期三十六巖內為選一巖奇

南都詩四十七首

正德甲戌年四月陞南京鴻臚寺卿作

題歲寒亭贈汪尚和

一覺紅塵夢欲殘江城六月滯風湍人間炎暑無逃
遯歸向山中臥歲寒

與徽州程畢二子

句句糠粃字字陳却於何處覓知新紫陽山下多豪

字世

俊應有吟風弄月人

山中懶睡四首

竹裏藤床識懶人脫巾山麓任吾真病夫久已逃方
外不受人間禮數嗔

掃石焚香任意眠醒來時有客談玄松風不用蒲葵
扇坐對青崖百丈泉

古洞幽深絕世人石床風細不生塵日長一覺羲皇
睡又見峰頭上月輪

人間白日醒猶睡老子山中睡却醒醒睡兩非還兩
是溪雲漠漠水泠泠

妙悟

同

知
心
陽

題灌山小隱二絕

苑屋山中早晚成。任他風雨任他晴。
男婚女嫁多年畢。不待而今學向平。

一自移家入紫煙。深林住久遂忘年。
山中莫道無供。給明月清風不用錢。

六月五章

六月乙亥南都熊峯少宰石公以少宗伯召南都之士聞之有惻然而戚者有欣然而喜者其戚者曰公端介敏直方為留都所倚重今茲往善類失所恃群小罔以嚴辯惑考學

者曷從而討究剖政斷疑者曷從而咨決南都非祖以本地乎而獨不可以公遺之其喜者曰公之一端介敏直寧獨留都所倚重其在京師獨無善類乎獨無群小乎獨無辯惑考學剖政斷疑者乎且天子之召之也亦寧以少宗伯將必大用大用則以庇天下期彙征之慶也公聞之曰戚者非吾之所敢喜者乃吾之所憂也吾思所以逃吾之憂者而不得其道若之何陽明子素知于公既以戚眾之戚喜眾之喜而復憂公之憂乃叙其事為賦六

月庸以贈公之行

六月凄風七月暑雨。倏雨倏寒。道脩以沮。允允君子。迪爾寢興。毋沾爾行。國步斯頻。

哀此下民。靡屆靡極。不有老成。其何能國。吁嗟老成。獨遺典刑。若屋之傾。尚支其楹。

心之憂矣。言靡有所。如彼暗人。食荼與苦。依依長谷。言采其芝。人各有能。我歸孔時。

昔彼叔季。沉湎以逞。耄集以咨。我人自靖。允允君子。淑慎爾則。靡曰休止。民何于極。

日月其逝。如彼滄浪。南北其望。如彼參商。允允君子。毋沾爾行。如日之升。以曷不光。

守文弟歸省携其手歌以別之

爾來我心喜。爾去我心悲。不爲倚門念。吾寧舍爾歸。長途正炎暑。爾行慎興居。涼茗勿頻啜。節食但無飢。勿去船旁立。勿登岸上嬉。收心每澄坐。適意時觀書。申洪皆冥頑。不足長嗔咎。見人勿多說。慎默真如愚。接人莫輕率。忠信持謙卑。從來爲己學。慎獨乃其基。紛紛多嗜欲。爾病還爾知。到家良足樂。怡顏報重闈。昨秋童蒙去。今夏成人歸。長者愛爾敬。少者悅爾慈。親朋稱嘖嘖。羨爾能若茲。信哉學問功。所貴在得師。

吾匪崇外飾欲爾沽名爲望爾日慥慥聖賢以爲期
九兄及印弟誦此共勉之

書扇面寄館賓

湖上群山落照情湖邊萬木起秋聲何年歸去陽明
洞獨棹扁舟鑑裡行

用實夫韻

詩從雪後吟偏好酒向山中味轉佳巖瀑隨風雜鐘
磬水花如雨落袈裟

游牛首山

春尋指天闕煙霞眇何許雙峰久相違千巖來舊主

浮雲刺中天飛閣凌風雨探秀澗阿入蘿陰息篔簹
滅迹避塵纓清朝入深沮風磴仰捫歷淙壑屢窺俯
梯雲躋石閣下榻得吾所釋子上方候鳴鐘出延佇
頽景耀回眄層翬翼輕舉暖暖林芳暮泠泠石泉語
清宵耿無寐峰月升烟宇會晤得良朋可以寄心腑

送徽州洪佺承瑞

平生舉業最踈慵挾冊虛煩五月從竹院檢方時論
藥茹堂放鶴或開籠憂時漫有孤忠在好古全無一
藝工念我還能來夜雪逢人休說坐春風

病中大司馬喬公有詩見懷次韻奉答二首

十日無緣拜後塵，病夫心地欲生榛。詩篇極見憐才意，伎倆慚非可用人。黃閣望公長秉軸，滄江容我老垂綸。保釐珍重回天手，會看春風萬木新。一自多岐分路塵，堂堂正道遂生榛。聊將膚淺窺前聖，敢謂心傳啓後人。淮海帝圖須節制，雲雷大造看經綸。枉勞詩句裁風雅，欲借盤銘獻日新。

送諸伯生歸省

天涯送爾獨傷神，歲月龍山夢裏春。爲謝江南諸故舊，起居東嶽太夫人。閑中書卷堪時展，靜裏工夫要日新。能向塵途薄軒冕，不妨簑笠老江濱。

寄馮雪湖二首

竿竹誰隱扶桑東，白眉之叟今龐公。隔湖聞鷄謝野接，渡海有鶴蓬山通。鹵田經歲苦秋雨，浪痕半壁驚湖風。歌聲屋低似金石，點也此意當能同。海岸西頭湖水東，他年簑笠擬從公。釣沙碧海群鷗借，樵徑青雲一鳥通。席有春陽堪坐雪，門垂五柳好吟風。于今猶是天涯夢，悵望青霄月色同。

諸用文歸用子美韻爲別

一別烟雲歲月深，天涯相見二毛侵。孤帆江上親朋意，樽酒燈前故國心。冷雪晴林還作雨，鳥聲幽谷自

成吟飲餘莫上峰頭望烟樹迷茫思不禁

題王實夫畫

隨處山泉着草廬底須松竹掩柴扉天涯遊子何曾
出畫裏孤帆未是歸小西諸峯開夕照虎溪春寺入
烟霏他年還向辰陽望却憶題詩在翠微

贈潘給事

五月滄浪濯足歸正堪荷葉製初衣甲非乙是君休
問酉水辰山志未違沙鳥不須疑雀舫江雲先爲掃
魚磯武陵溪壑猶深僻莫更移家入翠微

與沅陵郭掌教

記得春眠寺閣雲松林水鶴日爲群諸生問業衝星
入稚子拈香靜夜焚世事暗隨江草換道情曾許碧
山聞別來點瑟還誰鼓悵望烟花此送君

別族太叔克彰

情深宗族誼同方消息那堪別後荒江上相逢疑未
定天涯獨去意重傷身閑最覺湖山靜家近殊聞草
木香雲路莫嗟遲發軔世塗崎曲盡羊腸

登憑虛閣和石少宰韻

山閣新春負一登酒邊孤興晚堪乘松間鳴瑟驚棲
鶴竹裏茶烟起定僧望遠每來成久坐傷時有涕恨

壯志

夕集

夕集
無能峰頭見說連閭闔幾欲排雲尚未曾

登閱江樓

絕頂樓荒舊有名。高皇曾此駐龍旌。險存道德虛
天。暫守在蠻夷。豈石城山色古今餘。王氣江流天地
變。秋聲登臨授簡誰能賦。千古新亭一愴情。

獅子山

殘暑須還一雨清。高峰極目快新晴。海門潮落江聲
急。吳苑秋深樹脚明。烽火正防胡騎入。羽書愁見朝
雲橫。百年未有涓埃報。白髮今朝又幾莖。

游清凉寺三首

春尋載酒本無期。乘興還嫌馬足遲。古寺共憐春草
沒。遠山偏與夕陽宜。雨晴澗竹消蒼粉。風煖巖花落
紫鞋。昏黑更須凌絕頂。高懷想見少陵詩。

其二

積雨山行已後期。更堪多病益遲遲。風塵漸覺初心
負。丘壑真於野性宜。綠樹陰層新作蓋。紫蘭香細尚
餘蕤。輞川圖畫能如許。絕是無聲亦有詩。

其三

不顧尚書此日期。欲為花外板輿遲。繁絲急管人人
醉。竹徑松堂處處宜。雙樹暗芳春寂寞。五峯晴秀晚

羲裝暮鍾杳杳催歸騎惆悵煙光不盡詩

寄張東所次前韻

遠趨君命忽中違此意年來識者稀黃綺曾為炎祚
出子陵終向富春歸江船一話千年闊塵夢今驚四
十非何日孤帆過天目海門春浪掃魚磯

別余縉子紳

不須買棹往來頻我亦携家向海濱但得青山隨鹿
豕未論黃閣畫麒麟喪心疾已千年痼起死方存六
籍真歸向蘭溪溪上問桃花春水正迷津

送劉伯光

五月茅茨靜竹扉論心方洽忽辭歸滄江獨棹衝新
暑白髮高堂戀夕暉謾道六經皆註脚還誰一語悟
真機相知若問年來意已傍西湖買釣磯

冬夜偶書

百事支離力不禁一官棲息病相侵星辰魏闕江湖
迥松柏茅茨歲月深欲倚黃精消白髮由來空谷有
餘音曲肱已醒浮雲夢荷蕢休疑擊磬心

寄潘南山

秋風吹散錦溪雲一笑南山雨後新詩妙盡從言外
得易微誰見畫前真登山脚健何妨老留客情深不

不遠

計貧朱吕月林傳故事他年還許卜西鄰

送胡廷尉

鍾陵雪後市燈殘
簫鼓江船發曉寒
山水總憐南國好
才猷須濟朔方艱
綵衣得侍仙舟遠
春色行應故里看
別去中宵瞻北極
五雲飛處是長安

與郭子全

相別翻憐相見時
碧桃開盡桂枝光
陰如許成虛擲
世故催人總不知
雲路不須朱紱去
歸帆且得綵衣隨
嵐山風景灑溪近
此去還應自得師

次藥子仁韻送別四首

子仁歸以四詩請用其韻答之言亦有過者

蓋因子仁之病而藥之病已則去其藥

從來尼父欲無言
須信無言已躍然
悟到鳶魚飛躍處
工夫原不在陳編

操持存養本非禪
矯枉寧知已過偏
此去好從根脚起
竿頭百尺未須前

野夫非不愛吟詩
才欲吟詩即亂思
未會性情涵泳地
二南還是淫辭

道聽塗傳影響前
可憐絕學遂多年
正須閉口林間坐
莫道青山不解言

書悟真篇答張太常二首

悟真篇是誤真篇。二註由來一手箋。恨殺妖魔圖利益。遂令迷妄競流傳。造端難免張平叔。首禍誰誣薛紫賢。直說與君惟箇字。從頭去看野狐禪。

悟真非是悟真篇。平叔當時已有言。只為世人多戀着。且從情欲起因緣。痴人前豈堪談夢。真性中難更說玄。為問道人還具眼。試看何物是青天。

贛州詩三十二首

正德丙子年九月陞南贛僉都御史以後作

丁丑二月征漳寇進兵長汀道中有感

將略平生非所長。也提戎馬入汀漳。數峰斜日旌旗

遠。道春風鼓角揚。莫倚二師能出塞。極知克國善平羌。瘡痍到處曾無補。翻憶鍾山舊草堂。

回軍上杭

山城經月駐旌戈。亦復幽尋到薜蘿。南國已忻回甲馬。東田初喜出農蓑。溪雲曉度千峰雨。江漲新生兩岫波。暮倚七星瞻北極。絕憐蒼翠晚來多。

喜雨三首

即看一雨洗兵戈。便覺光風轉石蘿。順水飛檣來賈泊。絕江喧浪舞漁蓑。片雲東望懷梁國。五月南征想伏波。長擬歸耕猶未得。雲門初伴漸無多。

轅門春盡猶多事。竹院空閒未得過。特放小舟乘急浪。始聞幽碧出層蘿。山田旱久兼逢雨。野老歡騰且縱歌。莫謂可塘終據險。地形原不勝人和。

吹角峰頭曉散軍。橫空萬騎下氤氳。前旌已帶洗兵雨。飛鳥猶驚捲陣雲。南畝漸忻農事動。東山休共凱歌聞。正思鋒鏑堪揮淚。一戰功成未足云。

聞白仁買田雪上携同志待予歸二首

見說相携雪上耕。連簑應已出烏程。荒畬初墾功須倍。秋熟雖微稅亦輕。雨後湖舠兼學釣。餉餘堤樹合間行。山人久有歸農興。猶向千峰夜度兵。

色高林坐夜沉。此時何限故園心。山中古洞陰蘿合。江上孤舟春水深。百戰自知非舊學。三驅猶媿失前禽。歸期久負雲門伴。獨向幽溪雪後尋。

祈雨二首

旬初一雨遍汀漳。將謂汀虔是接疆。天意豈知分彼此。人情端合有炎涼。月行今已虛纏畢。斗杓何曾解挹漿。夜起中庭成久立。正思民瘼欲沾裳。

見說虔南惟苦雨。深山毒霧長陰陰。我來偏遇一春旱。誰解挽回三日霖。寇盜郴陽方出掠。干戈塞北還相尋。憂民無計淚空墮。謝病幾時歸海濔。

還贛

積雨零都道山途喜昨晴溪流遲渡馬岡樹隱前旌
野屋多移竈窮苗尚阻兵迎趨勤父老無補媿巡行

借山亭

借山亭子近如何乘興時從夢裏過尚想清池環醉
影猶疑花徑駐鳴珂疎簾細雨燈前局碧樹涼風月
下歌傳語諸公合頻賞休令歲月亦蹉跎

桶岡和邢太守韻二首

處處山田盡入畝可憐黎庶半無家興師正為民瘼
甚陟險寧辭鳥道斜勝勢真如甌水建先聲不得嶺

雲渡窮巢容有遭驅脇尚恐兵鋒或濫如

戢亂興師既有名揮戈真已見風行豈云薄劣能驅
策實仗皇威自震驚爛額尚慚為上客徒薪尤覺
費經營主恩未報身多病旋凱須還隴上耕

通天巖

青山隨地佳豈必故園好但得此身閑塵寰亦蓬島
西林日初暮明月來何早醉卧石牀涼洞雲秋未掃

遊通天巖次鄒謙之韻

天風吹我上丹梯始信青霄亦可躋俯視氛環成獨
慨却憐人世尚多迷東南真境埋名久閩楚諸峯入

天上非
人間

望低莫道仙家全脫俗。二更日出亦聞鷄。

又次陳惟濬韻

四山落木正秋聲。獨上高峰望眼明。樹色遙連閩嶠碧。江流不盡楚天清。雲中想見雙龍轉。風外時傳一笛橫。莫遣新愁添白髮。且呼明月醉沉觥。

坐忘言巖問二三子

幾日巖棲事若何。莫將佳景復虛過。未妨雲壑淹留久。終是塵寰錯誤多。澗道霜風疎草木。洞門煙月掛藤蘿。不知相繼來遊者。還有吾儕此意麼。

留陳惟濬

聞說東歸欲問舟。清遊方此復離憂。却看陰雨相淹滯。莫道山靈獨苦留。薜荔巖高兼得月。桂花香滿正宜秋。烟霞到手休輕擲。塵土驅人易白頭。

棲禪寺雨中與惟乾同登

絕頂深泥冒雨扳。天於佳景亦多慳。自憐久客頻移棹。頗羨高僧獨閉關。江草遠連雲夢澤。楚雲長斷九疑山。年來出處渾無定。慚愧沙鷗盡日間。

茶寮紀事

萬壑峯前秋正哀。四水雲霧晚初開。不因王事兼程入。安得閑行向此來。登陟未妨安石興。縱擒徒羨孔

明才乞身已擬全師日歸掃溪邊舊釣臺

回軍九連山道中短述

百里妖氛一戰清。萬峯雷雨洗回兵。未能干羽苗頑格深媿。壺漿父老迎。莫倚謀攻為上策。還須內治是先聲。功微不願希侯賞。但乞蠲輸絕橫征。

回軍龍南小憩玉石巖雙洞絕竒徘徊不忍去。因寓以陽明別洞之號兼留此作三首

甲馬新從鳥道回。覽竒遠更陟崔嵬。寇平漸喜流移復。春暖兼欣農務開。兩竇高明行日月。九關深黑閉風雷。投簪最好支茅地。戀土猶懷舊釣臺。

洞府人寰此最佳。當年空自費青鞵。摩幢旖旎懸仙仗。臺殿高低接緯階。天巧固應非斧鑿。化工無乃太安排。欲將點瑟携童冠。就攬春雲結小齋。陽明山人舊有居。此地陽明景不如。但在乾坤俱逆旅。曾留信宿即吾廬。行窩已許人先號。別洞何妨我借書。他日巾車還舊隱。應懷茲土復鄉閭。

再至陽明別洞和邢太守韻二首

春山隨處款歸程。古洞幽虛道意生。澗壑風泉時遠近。石門蘿月自分明。林僧住久炊遺火。野老忘機罷席爭。習靜未緣成久坐。却慚塵土逐虛名。

山水平生是課程，一淹塵土遂心生。耦耕亦欲隨沮
溺，七縱何緣得孔明。吾道羊腸須蠖屈，浮名蝸角任
龍爭。好山當面馳車過，莫漫尋山說避名。

夜坐偶懷故山

獨夜殘燈夢未成，蕭蕭牕外故園聲。草深石徑鼯鼯
笑，雪靜空山猿鶴驚。漫有緘書懷舊侶，常牽纓冕負
初情。雲溪漠漠春風轉，紫茵黃花又自生。

懷歸二首

深慚經濟學，封侯都付浮雲自。去留往事每因心有
得，身閒方喜世無求。狼烟幸息昆陽患，蠡測空懷杞

國憂。一笑海天空濶外，從知吾道在滄洲。

身經多難早知非，此事年來識者稀。老大有情成腐
德，細謀無計解重圍。意常不足真夷道，情到方濃是
險机。悵望衡茅無事日，漫吹松火織秋衣。

送德聲叔父歸姚

并序

守仁與德聲叔父共學於家君龍山先生。叔
父屢困場屋，一旦以親老辭廩歸養。交遊強
之出，輒笑曰：「古人一日養不以三公易，吾豈
以一老母博一弊儒冠乎？」若叔父真知內外
輕重之分矣。今年夏來贛，視某留三月，飄然

歸興不可挽，因為某曰：秋風蓴鱸，知子之興無日不切。然時事若此，恐即未能脫。吾不能俟子之歸舟，吾先歸為子開荒。陽明之麓，如何嗚呼？若叔父可謂真知內外輕重之分矣。某方有詩戒叔父曰：吾行子可無言，輒為賦此。

猶記垂髫共學年，于今鬢髮兩蒼然。窮通只好浮雲看，歲月真同逝水懸。歸鳥長空隨所適，秋江落木正無邊。何時却返陽明洞，蘿月松風掃石眠。
○示憲兒

好庭訓

幼兒曹聽教，誨勤讀書，要孝弟學謙恭，循禮義，節飲食，戒遊戲，毋說謊，毋貪利，毋任情，毋鬪氣，毋責人，但自治能下人，是有志能容人，是大器。凡做人在心地，心地好是良士，心地惡是兇類。譬樹菓，心是蒂，蒂若壞，菓必墜。吾教汝全在是，汝諦聽，勿輕棄。

贈陳東川

白沙詩裏莆陽子，盡是相逢逆旅間。開口向人談古禮，拂衣從此入雲山。

陽明先生文錄卷之三

陽明先生文錄卷四

外集

江西詩一百二十首

正德己卯年奉勅往福建處叛軍至豐城遭宸濠之變

趨還吉安集兵平之八月陞副都御史巡撫江西作

鄱陽戰捷

甲馬秋驚鼓角風。旌旗曉拂陣雲紅。王敢在汾淮
後戀闕真隨江漢東。群醜漫勞同犬吠。九重端合
是飛龍涓埃未遂酬滄海。病懶先須伴赤松。

書草萍驛

九月獻俘北上駐草萍時已暮忽傳王師已
及徐淮遂乘夜速發次壁間韻紀之二首

夕集
一戰功成未足奇，親征消息尚堪危。邊烽西北方傳警，民力東南已盡疲。萬里秋風嘶甲馬，千山斜日度旌旗。小臣何爾驅馳急，欲請回鑿罷六師。
千里風塵一劍當，萬山秋色送歸航。堂垂雙白虛頻疏，門已三過有底忙。羽檄西來秋黯黯，關河北望夜蒼蒼。自嗟力盡螳螂臂，此日回天在廟堂。

西湖

靈鷲高林暑氣清，竺天石壁雨痕晴。客來湖上逢雲起，僧住峰頭話月明。世路久知難直道，此身那得尚虛名。移家早定孤山計，種菓支茅却易成。

寄江西諸士夫

甲馬驅馳已四年，秋風歸路更茫然。慚無國手醫民病，空有官銜縻俸錢。湖海風塵雖暫息，江湘水旱尚相沿。題詩忽憶并州句，回首江西亦故園。

太息

一日復一日，中夜坐嘆息。庭中有嘉樹，落葉何淅歷。蒙翳亂藤纏，寧知絕根脉。丈夫貴剛腸，光陰勿虛擲。頭白眼昏昏，吁嗟亦何及。

宿淨寺四首

十月至杭，王師遣人追寧濠，復還江西，是日遂謝病，退居西

湖作

夕集
老屋深松覆古藤，羈棲猶記昔年曾。棋聲竹裏消閒
書，藥裹牕前對病僧。烟艇避人長曉出，高峰望遠亦
時登。而今更是多牽繫，欲似當時又不能。
常苦人間不盡愁，每拚須是入山休。若爲此夜山中
宿，猶自中宵煎百憂。百戰西江方底定，六飛南甸尚
淹留。何人真有回天力，諸老能無取日謀。
百戰歸來一病身，可堪時事更愁人。道人莫問行藏
計，已買桃花洞裏春。

歸興

山僧對我笑，長見說歸山。如何十年別，依舊不曾閑。

一絲無補，聖明朝兩鬢。徒看長二毛，自識淮陰非
國士。由來康節是人豪，時方多難容安枕。事已無能
欲善刀，越水東頭尋舊隱。白雲茅屋數峯高。

即事謾述四首

從來野性只山林，翠壁丹梯處處尋。一自浮名縈世
網，遂令真訣負初心。夜馳險寇天峰雪，秋虜強王漢
水陰。辛苦半生成底事，始憐莊舄亦哀吟。
百戰深秋始罷兵，六師冬盡尚南征。誠微未足回
天意，性僻還多拂世情。烟水滄江從鶴好，風雲溟海
任龍爭。他年若訪陶元亮，五柳新居在赤城。

宵宵深愁伴客居江船風雨夜燈虛尚勞 車駕臣
多缺無補瘡痍術已踈親老豈堪還遠別時危那得
父無書明朝且就居平卜 要使吾心不負初

茅茨松菊別多年底事寒江尚客船強所不能儒作
將付之無柰數由天徒聞諸葛能興漢未必田單解
誤燕最羨漁翁閒事業一竿明月一簑煙

泊金山寺二首

十日月將
趨行上

但過金山使一登鳴鐘出逐每勞僧雲濤石壁深龍
窟風雨樓臺迥佛燈難後註懷全欲減酒邊孤興尚
堪憑巖梯未用妨苔滑曾踏天峯雪棧冰

醉入江風酒易醒片帆西去雨冥冥天迴江漢留孤
住地缺東南着此亭沙渚亂更新世態峰巒不改舊
時青舟人指點龍王廟欲話前朝不忍聽

舟夜

隨處看山一葉舟夜深霜月亦兼愁翠華此際遊何
地畫角中宵起戍樓甲馬尚屯淮海北旌旗初散楚
江頭洪濤袞袞乘風勢容易開帆不易收

舟中至日

歲寒尤嘆滯江濱漸喜陽回大地春未有一絲添袞
繡謾提三尺淨風塵丹心倍覺年來苦白髮從教鏡

裏新若待完名始歸隱桃花笑殺武陵人

阻風

冬江盡說風長北偏我北來風便南未必天公真有
意却逢人事偶相參殘農得暖堪登獲破屋多寒且
曝簷果使困窮能稍濟不妨經月阻江潭

用韻答伍汝真

莫怪鄉隨日夜深干戈衰病兩相侵孤腸自信終如
鐵衆口從教盡鑠金碧水丹山曾舊約青天白日是
知心茅茨歲晚饒風景雲滿清溪雪滿岑

過鞋山戲題

曾駕雙虬渡海東青鞋失脚墮天風經過已是千年
後踪跡依然一夢中屈子慢勞傷世隘揚朱空自泣
途窮正須坐我匡廬頂濯足寒濤步曉空

楊邃菴待隱園次韻五首

嘉園名待隱專待主人歸此日真歸隱名園竟不違
巖花如共語山石故相依朝市都忘却無勞更掩扉

其二

大隱真塵市名園陋給孤留侯先謝病范老竟歸湖
種竹非醫俗移山不是愚是日公方移山石對時存癸理經
濟自成謨

好
不

其三

綠野春深地。山陰夜靜時。水霜綠逕滑。雲石向人危。
平難心仍在。扶顛力未衰。江湖兵甲滿。吟罷有餘思。

其四

茲園聞已久。今度始來窺。市裏烟霞靜。壺中結構奇。
勝遊須繼日。虛席亦多時。莫道東山僻。蒼生或未知。

其五

芳園待公隱。屯世待公亨。花竹深臺榭。風塵暗甲兵。
一身良得計。四海未忘情。語及艱難際。停盃淚欲傾。

登小孤書壁

人言小孤殊阻絕。從來可望不可攀。上有顛崖勢欲
墮。下有劔石交巉頑。峽風閃壁船難進。洪濤怒撞蛟
龍關。帆檣摧縮不敢越。往往退次依前山。崖傍沙岸
日東徙。忽成巨浸通西灣。帝心似憫舟楫苦。神斧夜
闢無痕斑。風雷倏翕見萬恠。人謀不得容其間。我來
銳意欲一往。小舟微服沿回瀾。側身脇息仰天竇。懸
空絕棧蛛絲慳。風吹卯酒眼花落。凍滑丹梯足力孱。
青鬣吹雨出。仍沒白鳥避客來。復還峰頭四顧盡。落
日宛然風景如瀛寰。煙霞未覺三山遠。塵土聊乘半
日閒。竒觀江海詎為險。世情平地猶多艱。嗚呼世情

平地猶多艱。回瞻北極雙淚潺。

登鵝矼次草泉心劉石門韻二首

中流片石倚孤雄。下有馮夷百尺宮。灑灑西蟠渾失地。長江東去正無窮。徒聞吳女埋香玉。惟見沙鷗亂雪風。往事淒微何足問。永安宮闕草萊中。

江上孤臣一片心。幾經漂沒水痕深。極憐撐住即從古。正恐崩頽或自今。蘚蝕秋螺殘老翠。鵝鳴春雨落空音。好携雙鶴矼頭坐。明月中宵一朗吟。

望廬山

盡說廬山若箇奇。當時圖畫亦堪疑。九江風浪非前日。五老烟雲豈定期。眼慣不妨層壁險。足躄須着短筇隨。香爐瀑布微如綫。欲決天河瀉上池。

除夕伍汝真用待隱園韻即席次答五首

一年今又去。獨客尚無歸。人世傷多難。親庭嘆久違。壯心都欲盡。衰病特相依。旅館聊隨俗。桃符換早扉。

其二

向憶青年日。追歡興不孤。風塵淹歲月。漂泊向江湖。濟世渾無術。違時竟笑愚。未須悲蹇難。列聖有遺謨。

其三

正逢兵亂地況是歲窮時天運終無息人心本自危
憂疑分并集筋力頓成衰千載商山隱悠然獲我思

其四

世道從厄漏人情只管窺年華多涉歷變故益新奇
莫憚顛危地曾逢全盛時海翁機已息應是白鷗飛

其五

星窮回曆紀貞極起元亨日望天迴駕先沾雨洗
兵雪猶殘歲戀風已舊春情莫更辭監尾人生未幾
傾

元日霧

多
感
念
懷

元日昏昏霧塞空出門咫尺誤西東人多失足投坑
塹我亦停車泣路窮欲斬蚩尤開白日還排閭闔拜
重瞳小臣漫有澄清志安得扶搖萬里風

二日雨

昨朝陰霧埋元日向曉寒雲迸雨聲莫道人爲無感
召從來天意亦分明安危他日須周勃痛哭當年笑
賈生坐對殘燈愁徹夜靜聽晨鼓報新晴

三日風

一霧二雨三日風田家卜歲疑凶豐我心惟願兵甲
解天意豈必斯民窮虎旅歸思懷舊土鑿輿消息

望還宮春般濁酒聊自慰無使戚戚干吾衷

立春二首

才見春歸春又來春風如舊髮毛衰梅花未放天機泄萱草先將地脉回漸老光陰逢世難經年懷抱欲誰開孤雲渺渺親庭遠長日斑衣羨老萊

天涯霜雪嘆春遲春到天涯思轉悲破屋多時空杼軸東風無力起瘡痍周王車駕窮南服漢將旌旗守北陲莫訝春盤斷生菜人間菜色正離此

遊廬山開元寺

僻性尋常慣受猜看山又是百忙來北風留客非無

意南寺逢僧即未回白日高峯開雨雪青天飛瀑瀉雲雷綠溪踏得支茆地修竹長松覆石臺

又次壁間杜牧韻

春山路僻問歸樵為指前峯石逕遙僧與白雲還暝壑月隨滄海上寒潮世情老去渾無賴遊興年來獨未消回首孤航又陳迹踈鐘隔渚夜迢迢

舟過銅陵埜云縣東小山有鐵船因往觀之果見其彷彿因題石上

青山滾滾如奔濤鐵船何處來停橈人間剗木寧有此疑是仙人之所操仙人一去已千載山頭日日長

鐵船太
已紙船
不及木
船口其
年

風號船頭出土尚彷彿後岡有石云船稍我行過此
費忖度昔人用心無乃切由來風波平地惡縱有鐵
船還未牢秦鞭驅之未能動其力何所施其篙我欲
乘之訪蓬島雷師鼓舵虹為鏢弱流萬里不勝芥復
恐駕此成徒勞世路難行每如此獨山斜陽首重搔

山僧

巖下蕭然老病僧曾求佛法禮南能論詩自許窺三
昧入聖無梯出小乘高閣松風飄夜磬石床花雨落
寒燈更深月出山牕曙漱齒焚香誦法楞

江上望九華山二首

當年一上化城峯十日高眠雷雨中心霽色曉開千嶂
雪濤聲夜渡九江風此時隔水看圖畫幾歲綠雲住
桂叢却負洞仙蓬海約玉函丹訣在崆峒
窮探雖得盡幽奇山勢須從遠望知幾朵芙蓉開碧
落九天屏嶂列旌麾高同華嶽應無忝名亞匡廬却
稍卑信是謫仙還具眼九華題後竟難移

觀九華龍潭

飛流三百丈瀕洞秘靈湫峽圻開雷斧天虛下月鉤
化形時試鉢吐氣或成樓吾欲鞭龍起為霖遍九州

廬山東林寺次韻

大而蒼

先怪

東林日暮更登山。峰頂高僧有蘭若。雲蘿磴道石參差。水聲深澗樹高下。遠公學佛却援儒。淵明嗜酒不入社。我亦愛山仍戀官。同是乾坤避人者。我歌白雲聽者寡。山自點頭泉自瀉。月明壑底忽驚雷。夜半天風吹屋尾。

。又次邵二泉韻

昨遊開元殊草草。今日東林遊始好。手持蒼竹撥層雲。直上青天招五老。萬壑笙竽松籟哀。千峯晡映芙蓉開。坐俯西巖窺落日。風吹孤月江東來。莫向人間空。白首富貴何如一。杯酒種蓮栽菊兩。荒涼惠遠陶。

蒼巖

遠公一點
孤禪

潛骨何朽。乘風我欲還金庭。三洲弱水連沙汀。他年海上望廬頂。烟際浮萍一點青。

。遠公講經臺

遠公說法有高臺。一朵青蓮雲外開。臺上久無獅子吼。野狐時復聽經來。

太平宮白雲

白雲休道本無心。隨我迢迢度遠岑。攔路野風吹斷。又穿深樹候前林。

書九江行臺壁

九華真實是奇觀。更是廬山亦耐看。幽勝未窮三日

興風塵已覺再來難。眼餘五老晴光碧。衣染天池積翠寒。却恠寺僧能好事。直來城市索詩刊。

又次李僉事素韻

省災行近郊。探幽指層麓。回飈振玄岡。頽陽薄西陸。蓄田收積雨。禾稼泛平菽。取徑歷村墟。停車問耕牧。清溪厲月行。暝洞披雲宿。浙米石間溜。芥薪澗底木。田翁來聚觀。中宵尚馳逐。將迎愧深情。瘡痍慚撫掬。幽枕靜無寐。風泉朗鳴玉。雖繆真訣傳。頗苦塵緣熟。終當遁名山。鍊藥洗凡骨。械辭謝親交。流光易超忽。

繁昌道中阻風二首

阻風夜泊柳邊亭。懶夢還鄉午未醒。臥穩從教波浪惡。地深長是水雲冥。入林沽酒村童引。隔水放歌漁父聽。頗覺看山緣獨在。蓬牕剛對一峯青。

東風漠漠水雲濛。花柳沿村春事啟。泊久漁樵來作市。心閒麋鹿漸同群。自憐失脚趨塵土。長恐歸期負海雲。正憶山中詩酒伴。石門延望幾斜曛。

江邊阻風散步至靈山寺

歸船不遇打頭風。行脚何緣到此中。幽谷餘寒春雪在。虛簷斜日暮江空。林間古塔無僧住。花外仙源有路通。隨處看山隨處樂。莫將踪跡嘆萍蓬。

泊舟大同山溪問諸生聞之有挾冊來尋者

扁舟經月住林隈。謝得黃鶯日日來。兼有清泉堪洗耳。更多修竹好啣盃。諸生涉水携詩卷。童子和雲掃石苔。獨柰華峰隔煙霧。時勞策杖上崔嵬。

巖下桃花盛開携酒獨酌

小小山園幾樹桃。安排春色候停撓。開樽旋掃花陰雪。展席平臨松頂濤。地遠不須防俗駕。溪晴還好着漁舸。雲間石路稀人跡。深處容無避世豪。

白鹿洞獨對亭

五老隔青冥。尋常不易見。我來騎白鹿。凌空陟飛巖。

長風捲浮雲。褰帷始窺面。一笑仍舊顏。愧我鬢先變。我來爾為主。乾坤亦郵傳。海燈照孤月。靜對有餘眷。彭蠡浮一觴。賓主聊酬勸。悠悠萬古心。默契可無辯。

豐城阻風

前歲遇難於此得此風幸免

北風休嘆北船窮。此地曾經拜北風。句踐敢忘嘗膽地。齊威長憶射鉤功。橋邊黃石機先授。海上陶朱意頗同。況是倚門衰白甚。歲寒茅屋萬山中。

江上望九華不見

五旬三過九華山。一度陰寒一度雨。此來天色稍晴明。忽復昏霧起亭午。平生山水最多緣。獨此相逢容

何本句

有數人言此山天所秘山下居人不常睹蓬萊涉海
或可求瑤水崑崙俱舊遊洞庭何止吞八九五嶽曾
向囊中收不信開雲掃六合手扶赤日照九州駕風
騎氣覽八極視此瑣屑真浮漚

江施二生與醫官陶堃冒雨登山人多笑之戲

作歌

江生施生頗好奇偶逢陶堃奇更痴共言山外有佳
寺勸予往遊爭願隨是時雷雨雲霧塞多傳險滑難
車騎兩生力陳道非遠堃請登高覘路岐二人冒雨
陟岡背既仆復起相牽携同儕咻笑招之返奮袂徑

可詆為
可笑

往凌嶽崎歸來未暇顧沾濕且說地近山逕夷青林
宿靄漸開霽碧巘絳氣浮微曦津津指譬在必往與
劇不道傍人嗤予亦對之成大笑不覺老興如童時
平生山水已成癖歷深探隱忘飢疲年來世務頗羈
縛逢場遇境心未衰堃本求仙志方外兩生學士亦
爾為世人趨逐但聲利赴湯踏火甘傾危解脫塵囂
事行樂爾輩狂簡翻見譏歸與歸與吾與爾陽明之
麓終爾期

遊九華道中

微雨山路滑山行入輕舟桃花夾岸迷遠近迴巒疊

嶂盤深幽竒峰應接勞回首瞻之在前忽在後不道
舟行轉屈曲但恠青山亦奔走薄午雨霽雲亦開青
鞋布襪無塵埃梅蹊柳徑度村落長松白石穿林隈
始攀風磴出木杪更俯懸崖聽瀑雷亂山高頂藏平
野茆屋高低自成社此中那得有人家恐是當年避
秦者西巖日色漸欲下且向前林秣吾馬世途濁隘
不可居吾將此地成蘭若

芙蓉閣

九華之山何崔嵬芙蓉直傍青天裁剛風倒海吹不
動大雪裂地凍還開夜半峯頭掛明月宛如玉女臨

善詠物

粧臺我拂滄浪寫圖畫題詩還媿沈謫仙才

重遊無相寺次韻四首

遊興殊未盡塵寰不可留山青只依舊白盡世間頭

其二

人迹不到地茆茨亦數間借問此何處云是九華山

其三

拔地千峰起芙蓉挿曉寒當年看不足今日復來看

其四

瀑流懸絕壁峯月上寒空鳥鳴蒼磧底僧住白雲中

登蓮花峯

蓮花頂上老僧居。脚踏蓮花不染泥。夜半華心吐明月。一顆懸空黍米珠。

重遊無相寺次舊韻

舊識仙源路未差。也從谷口問桃花。屢攀絕棧經殘雪。幾度清溪踏月華。虎穴相隣多異境。鳥飛不到有僧家。頻來休下仙翁榻。只借峯頭一片霞。

登雲峯望始盡九華之勝因復作歌

九華之峯九十九。此語相傳俗人口。俗人眼淺見皮膚。焉測其中之所有。我登華頂拂雲霧。極目奇峯那有數。巨壑中藏萬玉林。大劔長鎗攢武庫。有如智者

借山發
出一段

詩

深。韜藏復如淑女。避讒妬。閤然。避世不求知。卑已尊人。羞逞露。何人不道九華奇。立中之奇人。未知我欲窮。搜盡指出。秘藏恐是天所私。旋解詩囊。旋收拾。脫穎露出。錐參差。從來題詩李白好。渠於此山亦潦草。曾見王維畫。輞川安得渠來。拂纖縞。

雙峯遺柯生喬

爾家雙峯下。不見雙峯景。如錐處囊中。深藏未脫穎。盛德心愈卑。幽人迹多屏。悠然望雙峯。可以發深省。歸途有僧自望華亭來。迎且請詩。

方自華峯下。何勞更望華。山僧援故事。要我到渠家。

逸思

白謂遊已至那知望轉佳正如酣醉後醒酒卻須茶
無相寺金沙泉次韻

黃金不布地傾汴瀉流泉潭淨長開鏡池分或鑄蓮
興雲爲大雨濟世作豐年縱有貪夫過清風自灑然
夜宿天池月下聞雷次早知山下大雨三首

昨夜月明峰頂宿隱隱雷聲在山麓曉來却問山下
人風雨三更捲茆屋

野人權作青山主風景朝昏頗裁取巖傍日脚半溪
雲山下雷聲一村雨

天池之水近無主水魅山妖競偷取公然又盜山頭

雲去向人間作風雨

文殊臺夜觀佛燈

老夫高卧文殊臺拄杖夜撞青天開散落星辰滿平
野山僧盡道佛燈來

書汪進之太極巖二首

一竅誰將混沌開千年樣子道州來須知太極元無

極始信心非明鏡臺

始信心非明鏡臺須知明鏡亦塵埃人人有箇圓圈
在莫向蒲團坐死灰

勸酒

大道理

喻意

妙

外集
平生忠赤有天知，便欲欺人肯自欺。毛髮暗從愁裏
改，世情明向笑中危。春風脉脉回柯草，殘雪依依戀
舊枝。謾對芳樽辭酪酊，機關識破已多時。

重遊化城寺二首

愛山日日望山晴，忽到山中眼自明。鳥道漸非前度
險，龍潭更比舊時清。會心人遠空遺洞，識面僧來不
記名。莫謂中丞喜忘世，前途風浪苦難行。

山寺重來十九秋，舊僧零落老比丘。簷松盡長青冥
榦，瀑水猶懸翠壁流。人住層崖嫌洞淺，鳥鳴春澗覺
山幽。年來別有閑尋意，不似當時孟浪遊。

遊九華

九華原亦是移文，錯恠山頭日日雲。乘興未甘回俗
駕，初心終不負靈均。紫芝香煖春堪茹，青竹泉高晚
更分。幽夢已分塵土累，清猿正好月中聞。

弘治壬戌嘗遊九華，值時陰霧竟無所覩。至是
正德庚辰復往遊之，風日晴朗，盡得其勝。喜而
作歌。

昔年十日九華住，雲霧終旬竟不開。有時昏夜入寶
藏，兩目無覩成空回。每逢好事談竒勝，即思策蹇還
一來。頻年驅逐事兵革，出入賊壘衝風埃。恐恐晝夜

不遑息。豈復山水能徘徊。鄱湖一戰偶天幸。遠隨歸
 凱。停江隈。是時軍務頗多暇。況復我馬方虺。墮舊遊
 諸生亦群集。遂將童冠登崔嵬。先晨霏靄尚暝晦。却
 疑山意猶嫌猜。猜肩輿一入青陽境。忽然白日開西嶺。
 長風擁篲掃浮陰。九十九峯如夢醒。群巒踊躍爭獻
 奇。兒孫俯伏摩其頂。今來始識九華面。恨無詩筆為
 傳影。層樓疊閣寫未工。干朵芙蓉抽玉井。恠哉造化
 亦安排。天下奇山此兼并。攬衣登高望八荒。雙闕下
 見。日月光長。江如帶繞山麓。五湖七澤皆陂塘。蓬瀛
 海上浮拳石。舉足可到虹可梁。仙人為我啓閭闔。鸞

輶駕紛紛翔。從茲脫屣謝塵世。飄然拂袖凌蒼蒼。

巖頭閒坐謾成

盡日巖頭坐落花。不知何處是吾家。靜聽谷鳥遷喬
 木。閒看林蜂散午衙。翠壁泉聲穿亂石。碧潭雲影透
 晴沙。知兒公事真難了。須信吾生自有涯。

將遊九華移舟宿寺山二首

逢山未愜意。落日更移船。峽寺綠溪逕。雲林帶石泉。
 鐘聲先度嶺。月色已浮川。今夜巖房宿。寒燈不待懸。

其二

維舟谷口傍。煙霏共說前岡。石徑微竹杖穿雲。尋寺

去藤筐採藥帶花歸諸生晚佩聯芳杜野老春霞綴
衲衣風詠不須沂水上碧山明月更清輝

登雲峰二三子詠歌以從欣然成謠二首

淳氣日凋薄鄒魯亡真承世儒昌臆說愚瞽相因仍
晚途益淪溺手援吾不能棄之入煙霞高歷雲峯層
開茅傍虎穴結屋依巖僧豈曰事高尚度兔無予憎
好鳥求其侶嚶嚶林間鳴而我在空谷焉得無良朋
飄飄二三子春服來從行詠歌見真性逍遙無俗情
各勉希聖志毋為塵所縈

深林之鳥何間關我本無心雲自閒大舜亦與木石

處醉翁惟在山水間晴牕展卷有會意絕壁題詩無
厚顏顧謂從行二三子隨遊麋鹿俱忘還

有僧坐巖中已三年詩以勵吾黨

莫恠巖僧木石居吾儕真切幾人如經營日夜身心
外剽竊糠粃齒頰餘俗學未堪欺老衲昔賢取善及
陶漁年來奔走成何事此日斯人亦起予

春日遊齊山寺用杜牧之韻二首

即看花發又花飛空向花前嘆式微自笑半生行脚
過何人未老乞身歸江頭鼓角翻春浪雲外旌旗閃
落暉羨殺山中麋鹿伴千金難買芟荷衣

不從壞
僧住有
卷見

倦鳥投枝已亂飛。林間暝色漸霏微。春山日暮成孤坐。遊子天涯正憶歸。古洞濕雲含宿雨。碧溪明月弄清暉。桃花不管人間事。只笑山人未拂衣。

重遊開元寺戲題壁

中丞不解了公事。到處看山復尋寺。尚為妻奴守俸錢。至今未得休官去。三月開元兩度來。寺僧倦客門未開。山靈似嫌俗士駕。溪風攔路吹人回。君不見富貴中人如中酒。折腰解醒須五斗。未妨適意山水間。浮名于我亦何有。

賈胡行

賈胡得明珠藏珠。剖其軀珠藏未能有此身。已先無輕已重外物賈胡。一何愚請君勿笑賈胡愚。君今奔走聲利途。鑽求富貴未能得。弊精勞形骨髓枯。竟日惶惶憂毀譽。終宵惕惕防艱虞。一日僅得五升米。半級仍甘九族誅。胥靡接踵略無悔。請君勿笑賈胡愚。

送邵文實方伯致仕

君不見。櫛下鷄引類。呼群啄且啼。稻梁已足脂漸肥。毛羽脫落充庖厨。又不見籠中鶴。斂翼垂頭困牢落。籠開一旦入層雲。萬里翱翔縱廖廓。人生山水須認真。胡為利祿纏其身。高車駟馬盡桎梏。雲臺麟閣皆

夕集
方山文集卷四
埃塵。鷗夷抱恨浮江水。何似乘舟逃海濱。舜水龍山
予舊宅。讓公且作煙霞伯。拂衣便擬逐公回。爲予先
掃峰頭石。

記夢 并序

正德庚辰八月廿八夕卧小閣忽夢晉忠臣
郭景純氏以詩示予且極言王導之奸謂世
之人徒知王敦之逆而不知王導實陰主之
其言甚長不能盡錄覺而書其所示詩於壁
復爲詩以紀其畧嗟乎今距景純若干年矣
非有實惡深冤鬱結而未暴寧有數千載之

下尚懷憤不平若是者耶

秋夜卧小閣夢遊滄海濱海上神山不可到金銀宮
闕高嶙峋中有仙人芙蓉巾顧我死若平生親欣然
就語下烟霧自言姓名郭景純携手歷歷訴衷曲義
憤感激難具陳切齒尤深怨王導深奸老猾長欺人
當年王敦覬神器導實陰主相緣夤不然三問三不
答胡忍使敦殺伯仁寄書欲拔太真舌不相爲謀敢
爾云敦病已篤事已去臨哭嫁禍復賣敦事成同享
帝王貴事敗仍爲顧命臣幾微隱約亦可見世史掩
覆多失真袖出長篇再三讀覺來字字能書紳開牕

試抽晉史閱中間事迹頗有因。因思景純有道者世
 移事往千餘春若非精誠果有激。豈得到今猶憤嗔。
 不成之語以筮戒敦實氣沮竟殞身。人生生死亦不
 易。誰能視死如輕塵。燭微先幾炳易道。多能餘事非
 所論。取義成仁忠晉室。龍逢冀勝心可倫。是非顛倒
 古多有。吁嗟景純終見伸。御風騎氣遊八垠。彼敦之
 徒草木糞土臭腐同沉淪。

我昔明易道。故知未來事。時人不我識。遂傳航一
 技。一思王導徒。神器良久覬。諸謝豈不力。伯仁見
 其底。所以敦者傭。罔顧天經與地義。不然百口未

負托何忍置之死。我於斯時知有分。日中斬柴市。
 我死何足悲。我生良有以。九天一人撫膺笑。晉室
 諸公亦可耻。舉目山河徒嘆非。携手登亭空灑淚。
 玉導真奸雄。千載人未議。偶感君子談。中及重與
 寫真記。固知倉卒不成文。自今當與頽謔戲。倘其
 爲我一表揚。萬世萬世萬萬世。

右晉忠臣郭景純自述詩。蓋予夢中所得者。
 因表而出之。

無題

巖頭有石人。爲我下嶙峋。脚踏破履五十兩。身披舊

奇
怪

夕集

陽明文集卷四

三

衲四十斤。任重致遠。香象力。餐霜坐雪。金剛身。夜寒
雙虎與温足。雨後禿龍來伴宿。手握頑碑鏡未光。舌
底流泉梅未熟。夜來拾得遇寒山。翠竹黃花好共看。
同來問我安心法。還解將心與汝安。

遊落星寺

女媧煉石補天漏。璇璣晝夜無停走。自從墮却玉衡
星。至今七政迷前後。渾儀晝夜徒揣摩。敬授人時亦
何有。玉衡墮却此湖中。眼前誰是補天手。

遊通天巖示鄒陳二子

鄒陳二子皆好遊。一往通天十日留。候之來歸久不

至。我亦乘興聊尋幽。巖扉日出雲氣浮。二子晞髮
巖頭谷。轉始聞人語。響蒼壁杳杳長林秋。嗒然坐我
亦忘去。人生得休且復休。採芝共約陽明麓。白首無
慚黃綺儔。

青原山次黃山谷韻

咨觀歷州郡。驅馳倦風埃。名山特乘暇。林壑盤縈迴。
雲石綠歌逕。夏木深層隈。仰窮嵐霏際。始覩臺殿開。
衣傳西竺舊。構遺唐宋材。風松溪溜急。湍響空山哀。
妙香隱玄洞。僧屋懸穹崖。拔依儼龍象。陟降臨緯階。
飛泉瀉靈竇。曲檻連雲榭。我來慨遺迹。勝事多湮埋。

邈矣西方教，流傳遍中垓。如何皇極化，反使吾人猜。
 剝陽辛未絕，生意存枯荄。傷心眼底事，莫負生前盃。
 煙霞有本性，山水乞歸骸。崎嶇羊腸坂，車輪幾傾摧。
 蕭散麋鹿伴，澗谷終追陪。恬愉返真澹，閑寂辭喧塵。
 至樂發天籟，絲竹謝淫哇。千古自同調，豈必時代偕。
 珍重二三子，茲遊非偶來。且從山叟宿，勿受役夫催。
 東峰上烟月，夜景方徘徊。

睡起偶成

四十餘年睡夢中，而今醒眼於朦朧。不知日已過停
 午，起向高樓撞曉鐘。

知非

起向高樓撞曉鐘，尚多昏睡正懵懵。縱今日暮醒猶
 得不信人間耳盡聾。

立春

荒村亂後耕牛絕，城郭春來見土牛。家業苟存鄉井
 戀，風塵先幸甲兵休。未能布德慚時令，聊復題詩寫
 我憂。為報胡雛須遠塞，暫時邊將駐南州。

遊廬山開元寺

清晨入谷到斜曛，徧歷青霞躡紫雲。閭闔遠從雙劍
 闢，銀河真自九天分。驅馳此日原非暇，夢想當年亦
 自勤。斷擬罷官來駐此，不教林鶴更移文。

登小孤次陸良弼韻

看盡東南百二峯，小孤江上是真龍。攀龍我欲乘風去，高躡層霄絕世踪。

月下吟三首

露冷天清月更輝，可堪遊子倍沾衣。催人歲月心空在，滿眼兵戈事漸非。方朔本無金馬意，班超惟願玉門歸。白頭應倚庭前樹，惟我還期秋又違。
江天月色自清秋，不管人間底許愁。謾憶翠華旋北極，正憐白髮倚南樓。狼烽絕塞寒初入，鶴怨空山夜未休。莫重三公輕一日，虛名真覺是浮漚。

依依牕月夜還來，渺渺鄉愁坐未回。素位也知非自得，白頭無奈是親衰。當年竹下曾裘仲，何日花前更老萊。懇疏乞骸今幾上，中宵翹首望三台。

月夜二首

高臺月色倍新晴，極浦浮沙遠樹平。客久欲迷鄉國望，亂餘愁聽鼓鼙聲。湖南水潦頻移粟，磧北風煙且罷征。濡手未辭援溺苦，白頭方切倚間情。
舉世因酣睡，而誰偶獨醒。疾呼未能起，瞪目相恠驚。反謂醒者狂，群起環鬪爭。洙泗輟金鐸，濂洛傳微聲。誰鳴鍾擊鼓，聞者皆昏冥。嗟爾欲奚為，奔走皆營營。

惻
然

何當聞此鼓，開爾天聰明。

雪望四首

風雪樓臺夜更寒，曉來霽色滿山川。
當歌莫放陽春調，幾處人家未起煙。

初日湖山雪未融，野人村落閉重重。
安居信是豐年兆，為語田夫莫惰農。

霽景朝來更好看，河山千里思漫漫。
茅簷日色猶堪瀑，應是邊關地更寒。

法象冥濛失巨纖，連朝風雪費粧嚴。
誰將塵世化珠玉，好與貧家聚米鹽。

遊
神
記

卷

次秀官次一峯韻三首

茲山堪近迹，上應少微星。
洞裏乾坤別，壺中日月明。
道心空自警，塵夢苦難醒。
方嶠由來此，虛無隔九溟。

其二

清溪曲曲轉層林，始信桃源路未深。
晚樹煙霏山閣靜，古松雷雨石壇陰。
丹爐遺火飛殘藥，仙樂浮空寄絕音。
莫道山人才一到，千年陳迹此重尋。

其三

落日下清江，悵望閣道晚人言。
玉筍更奇絕，漳口停舟路非遠。
肩輿取徑沿村落，心目先馳嫌足緩。
山昏

聊就雲儲眠疎林月色聞風泉夢魂忽忽到真境侵
曉循迹來洞天洞天非人世予亦非世人當年曾此
寄一迹屈指忽復三千春巖頭坐石剝落盡手種松
栢枯龍鱗三十六峯僅如舊澗谷漸改溪流新空中
仙樂風吹斷化為鼓角驚風塵風塵慘淡半天地何
當一掃遠吾真從行諸生駭吾說問我恐是茲山神
君不見廣成子高卧崆峒長不死到今一萬八千年
陽明真人亦如此

歸懷

行年忽五十頓覺毛髮改四十九年非童心獨猶在

世故漸改涉遇坎稍無餒每當快意事退然思辱殆
傾否作聖作物觀豈不快奈何桑梓懷哀白倚門待

啾啾吟

知者不惑仁不憂君胡戚戚眉雙愁信步行來皆坦
道憑天判下非人謀用之則行舍即休此身浩蕩浮
虛舟丈夫落落掀天地豈顧束縛如窮囚千金之珠
彈鳥雀掘土何煩用錮鏤君不見東家老翁防虎患
虎夜入室啣其頭西家兒童不識虎執竿驅虎如驅
牛痴人懲噎遂廢食愚者畏溺先自投人生達命自
灑落憂讒避毀徒啾啾

于世者
不
得

居越詩三十四首

正德辛巳年
歸越後作

歸興二首

百戰歸來白髮新，青山從此作閒人。
峯攢尚憶衝蠻陣，雲起猶疑見虜塵。
島嶼微茫滄海暮，桃花爛熳武陵春。
而今始信還丹訣，却笑當年識未真。

其二

歸去休來歸去休，千貂不換一羊裘。
青山待我長爲主，白髮從他自滿頭。
種菓移花新事業，茂林脩竹舊風流。
多情最愛滄洲伴，日日相呼理釣舟。

次謙之韻

珍重江船冒暑行，一宵心話五言分。
明須從根本求生，死莫向支流辯濁清。
義柰世徑橫臆說，競搜物理外人情。
良知底用安排得，此物由來自渾成。

再遊浮峯次韻

廿載風塵始一回，登高心在力全衰。
偶懷勝事乘春到，况有良朋自遠來。
還指松蘿尋舊隱，提開雲石翦蒿萊。
後期此別知何地，莫厭花前勸酒盃。

夜宿浮峯次謙之韻

日日春山不厭尋，野情原自懶朝簪。
幾家茅屋山村靜，夾岸桃花溪水深。
石路草香隨鹿去，洞門蘿月聽猿吟。

且其案只

猿吟禪堂坐久發清聲。却笑山僧亦有心。

再遊延壽寺次舊韻

歷歷溪山記舊踪。寺僧遙住翠微重。扁舟曾泛桃花入。岐路新多草樹封。谷口鳥聲兼伐木。石門煙火出深松。年來百好俱衰薄。獨在幽探興尚濃。

碧霞池夜坐

一雨秋涼入夜新。池邊孤日倍精神。潛魚水底傳心訣。棲鳥枝頭說道真。莫謂天機非嗜欲。須知萬物是吾身。無端禮樂紛紛議。誰與青天掃宿塵。

秋聲

秋來萬木發天聲。點瑟回琴日夜清。絕調迥隨流水遠。餘音細入晚雲輕。洗心真已空千古。傾耳誰能辯九成。徒使清風傳律呂。人間瓦缶正雷鳴。

林汝桓以二詩寄次韻為別

斷雲微日半晴陰。何處高梧有鳳鳴。星漢浮槎先入夢。海天波浪不須驚。魯郊已自非常典。臚肉寧為脫冕行。試向滄浪歌一曲。未云不是九韶聲。

堯舜人人學可齊。昔賢斯語豈無稽。君今一日真千里。我亦當年苦舊迷。萬理由來吾具足。六經原只是階梯。山中儘有閑風月。何日扁舟更越溪。

月夜二首

與諸生歌于天泉橋

萬里中秋月正晴四山雲靄忽然生
須臾濁霧隨風散依舊青天自月明
肯信良知原不昧從他外物豈能櫻
老夫今夜狂歌發化作鈞天滿太清

處處中秋此月明不知何處亦群英
須憐絕學經千載莫負男兒過一生
影響尚疑朱仲晦支離羞作鄭康成
鏗然舍瑟春風裏點也雖狂得我情

秋夜

春園花竹始菲菲又是高秋落木稀
天迥樓臺含氣象月明星斗避光輝
閒來心地如空水靜後天機見

隱微深院寂寥群動息獨憐鳥鵲繞枝飛

夜坐

獨坐秋庭月色新乾坤何處更聞人
高歌度與清風去幽意自隨流水春
千聖本無心外訣六經須拂鏡中塵
却憐擾擾周公夢未及惺惺陋巷貧

心漁為錢翁希明別號題

有漁者歌曰漁不以目惟以心心不在魚
漁更深北溟之鯨殊小小一舉六鰲未足
歎敢問何如其為漁耶曰吾將以斯道為
網良知為綱太和為餌天地為魴絜之無
意散之無方是謂得無所得而忘無可忘

奇

祥

者矣

登香爐峯次蘿石韻

曾從爐鼎躡天風，下數天南百二峯。
勝事縱爲多病阻，幽懷還與故人同。
旌旗影動星辰北，鼓角聲迴滄海東。
世故茫茫渾未定，且乘溪月放歸篷。

觀從吾登爐峰絕頂戲贈

道人不要登山僻，日暮猶思絕棧雲。
巖底獨行牙虎穴，峰頭清嘯亂猿群。
清溪月出時尋寺，歸棹城隅夜扣門。
可笑中郎無好興，獨留松院坐黃昏。

書扇贈從吾

君家只在海西隈，日日寒潮去復迴。
莫遣扁舟成久別，爐峯秋月望君來。

嘉靖甲申冬二十一日再登秦望自弘治戊午
登後二十七年矣將下適蘿石與二三子來
復坐久之暮歸同宿雲門僧舍

初冬風日佳杖策登崔嵬自予羈宦迹久與山谷違
屈指廿七載今茲復一來官溪尋往路歷歷皆所懷
躋險還屢息興在知吾衰行午際峯頂曠望未能回
良朋亦偶至歸路相徘徊夕陽飛鳥靜羣壑風泉哀
悠悠觀化意默也可與偕

山中漫興

清晨急雨度林扉，餘滴煙稍尚濕衣。雨水霞明桃亂吐，沿溪風煖藥初肥。物情到底能容懶，世事從前頓覺非。自擬春光還自領，好誰歌詠月中歸。

挽潘南山

聖學宮牆亦久荒，如公精力可升堂。若為千古經綸手，只作終年著述忙。末俗澆漓風益下，平生辛苦意難忘。西風一夜山陽笛，吹盡南岡落木霜。

和董蘿石菜花韻

油菜花開滿地金，鶉鳩聲裏又春深。閭閻正苦饑民

色猷，畝常懷老圃心。自有牡丹堪富貴，也從蜂蝶漫追尋。年年開落渾閒事，來賞何人共此襟。

天泉樓夜坐和蘿石韻

莫厭西樓坐夜深，幾人今夕此登臨。白頭未是形容老，赤子依然混沌心。隔水鳴榔聞過棹，映牕殘月見疎林。看君已得忘言意，不是當年只苦吟。

詠良知四首示諸生

箇箇人心有仲尼，自將聞見苦遮迷。而今指與真頭面，只是良知更莫疑。

問君何事日憧憧，煩惱場中錯用功。莫道聖門無口

四咏口頭
理以子

訣良知兩字是參同
人人自有定盤針萬化根源本在心却笑從前顛倒
見枝枝葉葉外頭尋
無聲無臭獨知時此是乾坤萬有基拋却自家無盡
藏沿門持鉢效貧兒

示諸生三首

爾身各各自天真不用求人更問人但致良知成德
業謾從故紙費精神乾坤是易原非畫心性何形得
有塵莫道先生學禪語此言端的為君陳
人人有路透長安坦坦平平一直看盡道聖賢須有

秘翻嫌易簡却求難只從孝弟為堯舜莫把辭章學
柳韓不信自心原具足請君隨事反身觀

長安有路極分明何事幽人曠不行遂使蓁茅成間
塞儘教糜鹿自縱橫徒聞絕境勞懸想指與迷途却
浪驚冒險甘投蛇虺窟顛崖墮壑竟亡生

答人問良知二首

良知即是獨知時此知之外更無知誰人不有良知
在知得良知却是誰
知得良知却是誰自家痛癢自家知若將痛癢從人
問痛癢何源更問為

會後

好道理

○答人問道
○餓來喫飯倦來眠只此修行玄更玄說與世人渾不信却從身外覓神僊

寄題玉芝庵 丙戌

塵途駿馬勞千里月樹鷓鴣足一枝身既了時心亦了不須多羨碧霞池

別諸生

綿綿聖學已千年兩字良知是口傳欲識渾淪無芥鑿須從規矩出方圓不離日用常行內直造先天未畫前握手臨岐更何語慇懃莫媿別離筵

後中秋望月歌

一年兩度中秋節兩度中秋一樣月兩度當筵望月人幾人猶在幾人別此後望月幾中秋此會中人知在否當筵莫惜慇懃望我已衰年半白頭

書扇示正憲

汝自冬春來頗解學文義吾心豈不喜顧此枝葉事如樹不植根暫榮終必瘁植根可如何願汝且立志

送蕭子維憲副之任

衰疾悟止足閒居便靜修採芝深谷底考槃南澗頭之子亦早見枉帆經舊丘幽尋意始結公期已先道

好

知

外集

八陽明文集卷四

三

外集

書扇示正憲

三

星途觸來暑拯焚能自由黃鵠一高舉剛風翼難收
 懷茲戀丘隴回顧未忘憂徃志局千里豈伊枋榆投
 哲士營四海細人聊自謀聖作正思治吾衰亮可酬
 所望登才俊濟濟揚鴻休隱者嘉連遜仕者當誰儔
 寧無寥寂念宜急瘡痍瘳舍藏應有時行矣毋淹留

中秋

去年中秋陰復晴今年中秋陰復陰百年好景不多
 遇况乃白髮相侵尋吾心自有光明月千古團圓未
 無缺山河大地擁清輝賞心何必中秋節

嘉靖丙戌十二月庚申始得子年已五十有五

千古朱
 秋
 如

矣六有靜齋二丈昔與先公同舉于鄉聞之而

喜各以詩來賀藹然世交之誼也次韻為謝

海鶴精神老益強晚途詩價重圭璋洗兒惠比金錢
 貴爛目光呈奎井祥何物敢云繩祖武他年只好共
 爺長偶逢燈事開湯餅庭樹春風轉歲陽

其二

自分秋禾後吐芒敢云琢玉晚成璋漫憑先德餘家
 慶豈是生申降嶽祥携抱且堪娛老况長成或可望
 書香不辭歲歲臨湯餅還見吾家第幾郎

兩廣詩二十一首

嘉靖丁亥起
 平思田之亂

秋日飲月巖新構別王侍御

湖山夕繫念愧處限形迹遙望一水間十年靡由即
軍旅起哀廢驅馳豈遑息前旌道回岡取捷上崎側
新構鬱層椒石門轉深寂是時霜始降風凄羣卉折
壑靜響江聲牕虛涵海色夕陰下西岑涼月穿東壁
觀風此餘情撫景見高臆匪從群公錢何因得良覲
南徼方如燬救焚敢辭亟來歸幸有期終遂幽尋僻

復過釣臺

憶昔過釣臺驅馳正軍旅十年今始來復以兵戈起
空山煙霧深往迹如夢慕微雨林徑滑肺病雙足仄
仰瞻臺上雲俯濯臺下水人生何碌碌高尚當如此
瘡痍念同胞至人匪為已過門不遑入憂勞豈得已
滔滔良自傷果哉末難矣

右正德己卯獻俘行在過釣臺而弗及登今
茲復來又以兵革之役兼肺病足瘡徒顧瞻
悵望而已書此付桐廬尹沈元材刻置亭壁
聊以紀經行歲月云耳嘉靖丁亥九月廿二
日書時從行進士錢德洪王汝中建德尹楊
思臣及元材凡四人

方思道送西峯

西峯隱真境微境臨通衢行役空屢屢過眼仍塵迷
 青林外延望中閔何由窺方子巖廊器兼負雲霞姿
 每逢泉石處必刻棠陵詩茲山秀常玉之子囊中錐
 群峯灝秋氣喬木含涼吹此行非佳餞誰為發幽竒
 奈何眷清賞局促牽至期悠悠傷絕學之子亦如斯
 為君指周道直往勿復疑

。西安雨中諸生出候因寄德洪汝中并示書院諸生

幾度西安道江聲暮雨時機關鷗鳥破踪跡水雲疑
 仗鉞非吾事傳經媿爾師大真泉石秀新有鹿門期

德洪汝中方卜書院盛稱天真之奇并寄及之不踏天真路依稀二十年石門深竹逕蒼峽瀉雲泉
 泮壁環胥海龜疇見宋田文明原有象卜築豈無緣

寄石潭二絕

僕茲行無所樂樂與二公一會耳得見閑齋
 固已如見石潭矣留不盡之興於後期豈謂
 樂不可極耶聞尊恙已平復必於不出見客
 無乃太以界限自拘乎奉次二絕用發一笑
 且以致不及請教之憾

見說新居止隔山肩輿曉出暮堪還知公久已藩籬

撤何事深林尚閉關

乘興相尋涉萬山扁舟亦復及門還莫將身病為心病可是無關却有關

長生

長生徒有慕苦之大藥資名山遍探歷悠悠髮生絲微軀一繫念去道日遠而中歲忽有覺九還乃在茲非爐亦非鼎何坎復何離本無終始究寧有死生期彼哉遊方士詭辭反增疑紛然諸老翁自傳困多岐乾坤由我在安用他求為千聖皆過影良知乃吾師

南浦道中

南浦重來夢裏行當年鋒鏑尚心驚旌旗不動山河影鼓角猶傳草木聲已喜閭閻多復業獨憐饑饉未寬征迂踈何有甘棠惠慚愧香燈父老迎

重登黃土腦

一上高原感慨重千山落木正無窮前途且與停西日此地曾經拜北風劍氣晚橫秋色淨兵聲寒帶暮江雄水南多少流亡屋尚訴征求杵軸空

過新溪驛

猶記當年築此城廣狹湖寇正縱橫人今樂業皆安堵我亦經過一駐兵香火沿門慚老稚壺漿遠道及

念民

此仁者

從行峯山擎手疲勞甚且放歸休莫送迎

夢中絕句

此予十五歲時夢中所作今拜伏波祠下宛如夢中茲行殆有不偶然者因識其事于此卷甲歸來馬伏波早年兵法鬚毛皤雲埋銅柱雷轟柝六字題詩尚不磨

謁伏波廟二首

四十年前夢裏詩此行天定豈人為徂征敢倚風雲陣所過須同時雨師尚喜遠人知向望却慚無術救瘡痍從來勝算歸廊廟耻說兵戈定四夷

樓船金鼓宿烏蠻魚麗群舟夜上灘月遶旌旗千障靜風傳鈴柝九溪寒荒夷未必先聲服神武由來不救難想見虞廷新氣象兩堦干羽五雲端

破斷藤峽

才看干羽格苗夷忽見風雷起戰旗六月徂征非得已一方流毒已多時遷賓玉石分須早柳慶雲霓莫遲嗟爾有司懲既往好將恩信撫遺黎

平八寨

見說韓公破此蠻貅貅十萬騎連山而今止用三千卒遂爾收功一月間豈是人謀能奮勝偶逢天助及

師還窮搜極討非長計須有恩威化梗頑

南寧二首

一駐南寧五月餘始因送遠過僧廬淨屠絕壁經殘
燹井灶沿村見廢墟撫恤尚慚凋弊後遊觀正及省
耕初近聞襁負歸徭獐莫陋夷方不可居

勞矣田人莫遠迎瘡痍未定犬猶驚燹餘破屋須先
緝雨後荒畝莫廢耕歸喜逃亡來負襁貧憐繻綉綴
旗旌 聖朝恩澤寬如海醜魘盆魚縱爾生

往歲破桶岡宗舜祖世麟老宣慰嘗來督兵今
茲思田之役乃隨父致仕宣慰明輔來從事日

擊其父子孫三世皆以忠孝相承相尚也詩以
嘉之

宣慰彭明輔忠勤晚益敦歸師當五月冒暑淨絲氛
九霄雖已老報 國意尤懃五月衝炎暑回軍立戰
勲

愛爾彭宗舜少年多戰功從親心已孝報國意尤忠
題甘泉居

我聞甘泉居近連菊坡麓十年勞夢思今來快心目
徘徊欲移家山南尚堪屋渴飲甘泉泉飢食菊坡菊
行看羅浮雲此心聊復足

書泉翁壁

我祖死 國事肇禋在增城荒祠幸新復適來奉初
蒸亦有兄弟好念年思一尋蒼蒼蕪葭色宛隔環瀛
深入門散圖史想見抱膝吟賢郎敬父執童僕意相
親病軀不遑宿留詩慰慙懃落落千百載人生幾知
音道同著形迹期無負初心

陽明先生文錄卷之四

